

|                                                                              |         |
|------------------------------------------------------------------------------|---------|
| † Sier Lunardo Malipiero, di sier Hironimo, qu. sier Piero . . . . .         | 150. 57 |
| Sier Francesco Surian, fo a la Doana di mar, qu. sier Andrea . . . . .       | 126. 83 |
| † Sier Francesco Boldù, fo camerlengo a Trevixo, qu. sier Hironimo . . . . . | 147. 61 |
| Sier Zorzi Bragadin, qu. sier Piero, di Campo Rusolo . . . . .               | 122. 84 |
| † Sier Marco Antonio Zantani, qu. sier Hironimo. . . . .                     | 156. 57 |
| Sier Zuan Bragadin, qu. sier Zuan Francesco . . . . .                        | 116. 91 |
| Sier Lorenzo Baffo, fo vicesoracomito, di sier Zuan Giacomo . . . . .        | 114. 98 |
| Sier Zuan Alvise Michiel, di sier Domenego . . . . .                         | 125. 86 |
| † Sier Zuan Morexini, di sier Francesco l'avogador . . . . .                 | 168. 37 |

Et nota. Non potendo intrar el Garzoni per contumacia, in luogo di sier Hironimo Malipiero intrò V di la Paxa, perhò introe a dì 20 sier Lunardo Malipiero in Collegio.

Fu posto, per tutto il Collegio, havendo fatto fabricar una nave in Candia sier Agustin e Andrea Gritti qu. sier Zuane, e tolse robe di quì, il dazio per ducati 30, lasò pegno a la Ternaria vechia, li sia restituido. 159, 18, 16.

Fu posto, per li Savii: Toso di Bagnacavalo ha provision a Verona ducati 12, va in Cypro, vol tramudarla e si pagi in Cypro, sia preso farlo, e stagi in Famagosta a page 8 a l'anno. 187, 22.

Fu posto, per li Consieri, renovar il salvoconduto a Santo Lopez, per expedir una soa causa, e questo a requisition di l'orator Cesareo, per mexi 6. Ave: 90, 3, 13.

180\* Fu posto, per li Savii, et il resto dil Collegio, che a Zorzi Busichio qu. Pelegrin li sia dà provision ducati 8 per paga, a page 8, in Italia, et a Alexio Grimani, serve in Dalmatia, ducati 8, a page 8 l'anno, in Italia, et in Levante tutti 2 page 4. Ave: 176, 8, 6.

Fu posto, per li diti, che a Zuan Francesco Bagotichii bombardier li sia dà provision ducati 5 per paga, a raxon di page 8 a l'anno, a Verona, e stagi per bombardier a Verona. 136, 6, 3. *Item*: 155, 36, 4.

Fu posto, per li Savii: Il capitano zeneral fo deputà, Padoa ducati 18 milia, Brexa 12 milia, Bergamo 10 milia et 10 a la cassa di le presente occorrentie, resta aver ducati 19280, li sia dà ducati

4000 di danari di le fabriche, *videlicet* ducati 4000 per quartiron. Ave: 121, 33, 7.

Fo provà sier Giacomo Marzello qu. sier Piero, patron in Alexandria. 175, 3, 8; sier Daniel Bragadin di sier Andrea, 159, 3, 9.

A dì 19, *domenega*, la matina. Non fo cosa da conto.

Da poi disnar, fo Gran Conseio. Fu fatto capitano di le galie di Alexandria sier Hironimo Contarini, fo soracomito, qu. sier Anzolo; dil Conseio di X, in luogo di sier Piero Zen, va orator al signor Turco, niun pasoe. E altre voxe.

Fu posto, per li Consieri e Cai di XL, una parte, la copia sarà qui avanti, che volendo andar il Serenissimo qualche volta a veder li paludi con li Savii sora le Aque, perhò, quando l'anderà, li zudexi possino far sententia come fusse Soa Serenità in la terra. Fu presa.

A dì 20, la matina. Fo *lettere di Bruzele*, di 7, dil *Tiepolo orator*. Scrive, come domino Alvise Gritti à scritto ch'el Signor turco non farà exercito questo anno, non fazando il re Ferdinando *etiam* lui zente, et era partito di Buda per andar a Constantinopoli a veder di far le trieve. *Item*, lo imperator starà per Pasqua a Bruzele.

Da poi disnar, fo Conseio di X con Zonta. Feno 8 di Zonta, in la contraversia di Sovergnani, che mancava, *videlicet* sier Domenego Trivixan el cavalier procurator, sier Marco Dandolo dotor et cavalier, sier Marin Corner, sier Valerio Valier, sier Zuan Francesco Morexini, sier Antonio Sanudo, sien Marco Malipiero, sier Francesco Longo. Soto, una balota, sier Hironimo Querini.

*Item*, preseno una parte, che *de coetero* le election stiano serade e le polize integre si dagino fuora bolade, e a voxe a voxe se taia, aziò non possi esser pregierie, *ut in ea*.

A dì 21, la matina. Nulla fo da conto.

Da poi disnar, fu fato a la porta dil Collegio, in luogo di Lunardo Masser è morto, con ducati 140 a l'anno, Andrea Fazuol masser di la cancellaria. Balotà, 34.

Di Roma, di l'orator, fo *lettere*, di . . . . .  
Come . . . . .

Di Constantinopoli, di sier Francesco Bernardino baylo vene *lettere*, molto desiderate, di . . . . .  
*zener fin 14 fevrer*. Come non si fa armada ni exercito. Il Signor à expedi Barbarosa corsaro, et fatolo suo capitano in Ponente, et li ha dato 4 galie, et una patente, non fazi alcun danno a navilli de Venitiani.